



Fasnacht 2008

Sujet:

Basel - guet Nacht, schloof guet...

Am Himmel stoht e Stärnli znacht
am grosse Stärnemeer
D Basler Gschäft sage uns guet Nacht,
und am Siebeni isch d Stadt scho leer.

Aiegendlig sott Basel am Rhy
en ainzig Ykaufszentrum sy.
So hett me fir unseri Stadt als gworbe
doch die Idee, die dunggt is gstorbe.
Gang am Oobe dur d Freiestross,
denn merggsch gly, do isch nit meh loos.
Verainzelt hänn none baar Lääden offe
uff en Yykauf kasch Du numme hoffe.
Am Oobe „shoppe“ isch nimm glatt
und Basel wird zer Gaischterstadt.

Mir dängge, me fiehrt bi uns am Rhy
bald wieder dr Nachtwächter y:
Looset Ihr Lyt und lehnd Eich saage,
d Uhr het jetzt grad Siebeni gschlaage.
Gehnd jetzt alli gschwind zer Rueh
und mached Eiri Lääde zue.
Verrammlt alli Door und Diire
kemmet am Morge wieder fiire,
pfluused dief und e rächt e gueti Nacht.
Basel schloof yy, dr Nachwächter wacht.

D Tourischte wo unser Basel bsueche
dien innerlig scho zimmlig flueche.
En Oobe-Yykaufstour kame glatt vergässe
s hett sogar no kuum e Baiz zem ebbis Ässe.
So isch Basel, mir findes glatt,
vo dr Schwyz die ruheigsti Stadt.

„Was ist auch hier los, ruft Kai aus Büttel.
Ich brauch ne Hose und dazu ein „Küttel“.
Doch die Baseler begeben sich früh zur Ruh,
am Spätnachmittag ischt ja schon alles zu!!
Na denn, ich will kein Störefried sein
und kaufe drum in Lörrach ein.“

Und isch denn wirgglig emool ebbis los,
scho gohts s Jeemerle und s Schimpfe loos.
Bim Tadoo, ganz vyyle Lyt hetts gfallé,
hänn sis numme ganz kurz lo gnalle.
Halb Basel schreit scho Zettermordio,
si hänn sogar no d Bolizei lo ko.
Drum Basel leeg di still zer Rueh
und mach scheen d Fänschterlääde zue.

Wie kunnts ächt bi dr Euro 08 uuse,
ka Basel denn no wyterpfuuse?
Wenn Fääns in Fäänmeile singe, joohle
und ruschvoll in de Strosse droohle?
Denn muess Basel allem aa
fir s Seeleheil e “Careteam” ha.
Und speeter fir dr Eurokater
zem aabefahre none Psychiater?

Mir lehn is vo däne Schloofkappe nit verschregge
und gniesse Basel in alle Gasse - alle Egge.
Drei Daag Fasnacht, do isch dr Deifel loos.
Nochhär isch aber s Penne wieder riesegross.
Wenn au die halb Schwyz iber uns lacht
Schloof guet Basel und guet Nacht...

Hoffentlig isch an dr Ladäärne- und Waage-Usstellig me los...

Dää Zeedel het is wie allewyyle d Druggerei Bürgin in Birsfælde druggt. Dänge.